

堅

瓠

集

序

劉子政號博極羣書所奏七略
有雜小說二家而推原其出於
古之議官稗官乃余考其篇目
雜昉於黃帝史孔甲盤盂而小
說則有堯務成湯伊尹文囑鬻子

徐

說等篇若張平子所稱虞初九
百又其後焉者也吾郡褚子稼
軒好古多聞強識之士也所著
聖瓠集次第鏤板流傳人間久
矣茲復有全集之刻而乞其序
於予褚子爲吾友蒼書氏猶子

蒼書言語妙天下業與諸公序
作者之意及所以命名者揚摧
無餘蘊矣余特取其有合於古
之議官稗官以爲將來志藝文
者告焉或亦野史亭之一助云
東海一老徐柯題於三千六百

釣臺

堅瓠六集卷之一目錄

翰林風月

東坡帶笠

春夢婆

董恢儂屋

錦城

西湖詞

小甘羅

詩贈幼妓

題柳

朋字未正

逸少聯句

解縉新宰

朝鼓

聞蟬

員李勿穎

太公遇文王贊

頭插花枝

高明善對

山中宰相

格天閣頌

封厨娘

燒猪肉

乩贈密蘭沙

饒信經量

翠妃

袁長宮女

金陵養閒

虞姬廟對

戲綵堂

長髯客

君山

題紙帳

却金亭

中流砥柱贊

藝祖屬豬

漢書下酒

小孩兒

子飛樂

讓墻基

山庄四樂

端明不愛錢

陸滄浪

謝蝴蝶

于少保口占

章劉友善

驛壁詩

滕王閣

造洛陽橋

陶穀草制

未生保

閒忙令

賦犬

詩媒

小九

趙松雪詞

佛印書壁

錢神論

李南金題像

張胡叅禪

古今人相較

黃陵廟詩

重刻褚石農聖瓠集卷之一

甬上留香閣主人較刊

翰林風月

王梅溪云翰林風月三千首吏部文章二
百年老去自憐心尙在後來誰與子爭先
此歐陽公贈王介甫詩也介甫不敢爲退
之故答詩云他日畧曾窺孟子終身何敢
望韓公第介甫與退之優劣必有能辦者

人謂歐陽公此詩移贈蘇東坡則贈者無
失言當者無媿色

東坡帶笠

蘇子瞻在儋耳聞黎子雲城南載酒堂頗
佳一日訪之午後回遇雨從農家借笠着
屐路傍小兒相隨爭笑邑犬羣吠以爲異
人竹坡周少隱詩云持節休誇海上蘇前
身應是牧羊奴爲嫌朱紱當年夢故作黃

冠一笑娛遺跡與公靖物外清風爲我襲
衣襦憑誰喚起王摩詰畫作東坡帶笠圖

春夢婆

侯鯖錄東坡在昌化嘗負大瓢行歌田畝
間所歌者蓋隱詞也饑婦年七十二云內翰
昔日富貴一場春夢坡然之里人呼爲春
夢婆一日坡被酒獨行遍至子雲諸黎之
舍作詩云符老風流可奈何朱顏減盡鬢

絲多投梭每困東隣女換扇惟逢春夢婆
董恢僦屋

山房隨筆至元戊寅己卯間江陵董恢居
太原任丁角酒稅副使僦屋以居賦詩云
白髮蒼蒼一腐儒行無轍跡住無廬鄧林
萬頃青青木肯爲鷓鴣借一枝 翠閣朱
樓鎖掩扉尋常燕子不能歸落花吹汎東
風面遶遍芳簷無處依

錦城

孟蜀後主景於羅城多種芙蓉花開時四
十里如鋪錦繡高下相照張立作詩諷之
曰四十里城花發時錦囊高下照坤維雖
汝蜀國三秋景難入幽風七月詩及後朝
政亂立又爲詩曰去年今日到成都城上
芙蓉錦繡舒今日重來舊遊處此花憔悴
不如初能以詩諷諫者矣羣譏採餘作三

國蜀後主誤○天中記後主景于成都城
上種芙蓉花開如錦因名錦官城一日江
山明媚如錦也或曰錦官如銅官鹽官之
類范至能鎮成都有錦官集少陵詩花重
錦官城集中凡四見蜀本作錦官城

西湖詞

錢塘瞿宗吉祐學博才瞻風致俊朗作西
湖四時望江南詞云西湖景春日最宜晴

花底管絃公子宴水邊羅綺麗人行十里
按歌聲西湖景夏日正堪遊金勒馬嘶垂
柳岸紅妝人泛採蓮舟驚起水中鷗西湖
景秋日更宜觀桂子岡巒金粟富芙蓉洲
渚彩雲間爽氣滿前山西湖景冬日轉清
奇賞雪樓臺評酒價觀梅園圃訂春期共
醉太平時

小甘羅

羣談採餘溫州任道遜年十歲以善書貢
入京明英宗令書龍鳳二字甚工乃出對
曰九重殿上書龍鳳對日兩尺樓頭望斗
半上喜賜予甚厚時朝臣甚足成一詩云
年比甘羅少二週山川毓秀出溫州九重
殿上書龍鳳百尺樓頭望斗牛金馬玉堂
身已貴青燈黃卷業還修他時大展經綸
手重沐恩波拜冕旒後任至太常

詩贈幼妓

崇安翁仲和邁幼聰敏博記能文年十二
邑宰歐陽竦以對試之云笋出鑽鑽天邁
應聲曰葦生釘釘地宰大器之郡守元暉
以其幼不甚禮焉扣之曰小解元所讀何
書邁答曰無書不讀日下所講者詩之相
鼠耳知其譏已疑其未能文也逮宴復命
十二歲小妓乞詩邁卽題云年未十三四

嬌羞懶舉頭爾心還似我全未識風流守
大稱賞

題柳

浦城練葆光亭甫年八歲侍伯父出遊葆
光以手搔頭伯父戲之曰猴悲摸索頭葆
光應聲曰虎怒縱橫步又指道傍松曰喬
松夭矯龍蛇勢葆光曰恠石巉巖虎豹形
年十四以所業見王安石王喜之呼爲小

友表除崇文館說書從高遵裕西征途中
題詩云靈州城下千株柳忽被官軍砍作
薪他日玉關歸去後將何攀折贈行人

朋字未正

唐玄宗封泰山劉晏年八歲獻頌行在帝
奇其幼命張說試之曰國瑞也授太子正
字上戲之曰汝爲正字正得幾字晏對曰
餘字皆正惟朋字未正晏坐貴妃膝上親

爲總髻官人遺花投菓公卿邀請旁午名
振一時一日士御勤政樓大張聲樂時教
坊有王大娘善戴百尺竿上施木山狀瀛
洲方丈令小兒持絳節出入其間而舞不
輟命晏作詩晏卽吟曰樓頭百戰競爭新
惟有長竿妙入神誰謂綺羅翻有力猶自
嫌輕更着人上與妃及嬪御皆歡笑因命
牙笏紋袍賜之

逸少聯句

蘇州劉逸少年十一文辭精敏有老成體
其師潘閔攜見長洲宰王元之吳縣宰羅
思純二公召試之與之聯句畧不淹思羅
曰無風烟焰直劉曰有月竹陰寒羅曰日
移竹影侵碁局劉曰風遞花香入酒樽王
曰風雨江城暮劉曰波濤海寺秋王曰一
回酒渴思吞海劉曰幾度詩狂欲上天

數十聯二公驚異聞于朝賜進士及第

解大紳訴宰

解大紳縉七歲時母孀居苦於徭役解具
訴於縣宰併系以詩曰母在家中守父憂
却教兒子訴原由他年諒有相逢日好把
春風判筆頭宰疑假手於人復令賦堂下
小松縉應聲曰小小青松未出欄枝枝葉
葉耐霜寒如今正好低頭看他日參天仰

面難宰大奇之遂蠲其稅○按縉第後高
皇親拔爲庶吉士日侍左右特被寵眷沈
縉袁泰輩忌之者衆高皇慮縉少涵養將
爲衆所傾召其父至諭之歸期以十年後
來朝當大用乃知前詩好事者所爲也

鼓嘲

南史載高爽題鼓嘲孫梈云身有八尺圍
腹內無寸腸面皮如許厚受打未渠央○

堅瓠集

卷一

八

又神仙伊用昌夫婦咏鼓詞云釘着不知
侵骨髓打來只是沒心肝空腹被人謾

聞蟬

吳興陸蒙老爲晉陵宰喜作詩時州幕官
有好讒謗同列者一日同會忽聞蟬聲幕
官請陸咏之陸卽賦詩云綠陰深處汝行
藏風露從來是稻梁莫向高枝縱繁響也
應回首顧螳螂其人媿悟

貞李幼類

唐玄宗時貞倣年九歲詞辯注射坐人皆
驚帝曰半千孫固當然因問倣豈有類若
者倣跪口臣舅子李泌年七歲有書萬軸
覽過不忘帝卽召至方與張說觀奕使說
試其能說請賦方圓動靜泌曰願聞其畧
說曰方若碁局圓若碁子動若碁生靜若
碁死泌卽答曰方若行義圓若用智動若

三
月
二
日
多
一
聘材靜若得意說呼爲小友因賀帝得奇
童年九歲賦長歌曰天覆吾地載吾天地
生吾有意無不然絕粒昇天衢不然鳴珂
遊帝都焉能不貴復不去空作昂藏一丈
夫平生志氣多良圖請君看取百年事業
就扁舟泛五湖歌成傳寫人皆稱賞

太公遇文王贊

王勃少能文詞章蓋世文中子命題太公

遇女王贊勃曰姬昌好德呂望潛華城闕
雖近風雲尚賒漁舟倚石釣浦橫沙路幽
山僻溪深岸斜豹韜接惡龍鈴辟邪雖逢
切近猶得安車君王握手何期晚耶

頭插花枝

孫周翰自幼精敏其父穆之攜見郡侯時
值賞春侯與座客簪花因命周翰曰口次
楊柳成新曲翰曰頭插花枝學後生侯笑

曰何遽戲老夫

高明善對

瑞安高則誠明少辯慧善屬對年六歲父會客明從桌邊竊食客曰令郎捷對敢請試之曰小兒不識道理上桌偷食明對曰村人有甚文章中塲出對客曰細頸壺頭敢向腰間出嘴明日平頭鎖子却從肚裏生縑及長下筆成章

山中宰相

寧宗朝韓侂胄以定策功進位太師威權
隆重天子拱手而已一日過南園山庄趙
師舉偕行至東村別墅桑麻掩映雞犬相
聞一牧童騎犢且行且歌曰朝出耕田暮
飯牛林泉風月兩悠悠九重雖竊阿衡貴
爭得功名到白頭師舉呵日平章在此牧
童笑曰但識山中宰相安知朝內平章胄

曰宰相何人柰未識荆童曰公如欲見枉
駕草廬至則竹籬茅舍石磴藤床屏間有
二詩云病國妨賢主勢孤生民無計樂樵
蘇僞名枉玷朱元晦謀逆空污趙汝愚羊
質虎皮千載耻民膏血脉一時枯若知不
可同安樂早買扁舟客五湖 定策微勞
總是空一時狐假虎威風不知積下滔天
罪尚欲謀成蓋世功披露姦心思幼主彰

聞惡德辱先公王津園內行天討怨血空
流杜宇紅胄勃然變色方欲促駕童曰主
人至矣見一叟龐眉在髮淚衣幅巾扶筇
而來年可七八旬態度閑雅自稱袁處士
揖胄進曰貴人光賁有失祇迎乞恕不恭
揖遜而坐胄徐曰屏間之詩何人所作處
士荅曰老朽寫懷不意見讓於貴人也胄
曰軍國重事誰敢私議處士笑曰太師挾

振主之威操不賞之權羣小盈朝國事日
非土崩瓦解可立而待雖欲建恢復之功
誠恐北方未可圖而南方已騷動矣愚意
勢倒冰山危如朝露誠孔子所謂不在顯
與而在蕭牆之內也太師其密圖之胄面
色如土左右欲兵之胄歎曰真諒士也扶
而去之後胄用師果無功效未幾禍作爲
史彌遠誅于王津園

格天閣頌

秦檜當國建一德格天之間有朝士賀以
啟云我聞在昔惟伊尹格于皇天民到于
今徵管仲吾其左衽檜大喜超擢之又新
選人投詩云多少儒生新及第高燒銀燭
照娥眉格天閣上三更雨猶誦車攻復古
詩檜尤喜卽與改秋

封厨娘

宋高宗宴大臣見張循王俊持一扇有王
孩兒扇墜高宗識是十年前在四明誤落
於水屢網不獲乃詢於俊俊對曰臣於清
河坊舖家買得說是候潮門陳宅厨娘破
黃花魚腹中得之高宗大悅以爲失物復
得二聖可還之兆乃封厨娘

燒猪肉

東坡喜食燒猪肉佛印住金山時每燒猪

以待一日爲人竊食坡至無矣戲作詩曰
遠公沽酒飲陶潛佛印燒猪待子瞻採得
百花成蜜後不知辛苦爲誰甜又在黃岡
時戲作食肉詩云淨洗鎚少着水柴頭罨
烟焰不起待他自熟莫催他火候足時他
自美黃州好猪肉價賤如泥土貴者不肯
吃貧者不鮮煮早農起來打兩碗飽得自
家君莫管此東坡以文滑稽而雲仙散錄

載黃昇日食鹿肉二觔自晨煮至午則曰
火候足矣乃知坡老雖食肉亦用故事

亂贈密蘭沙

元至順辛未間福建廉訪使密蘭沙求仙
紫姑降筆云刀筆相從四十年非非是是
萬千千一家富貴千家怨半世功名百世
愆牙笏紫袍今已矣芒屨竹杖任悠然有
人間我蓬萊事雲在青山水一作在天

饒信經量

理宗淳祐壬子饒信行經量鄱陽以邑庠
置局有題詩云大成殿下水漫漫堂上盡
是經量官孔子回頭顧孟子是你說出許
多般又有沁園春詞云道過江南泥墻粉
壁右具在前述何縣何鄉里住何人地佃
何人田氣象蕭條生靈憔悴經界從來未
必然惟何甚爲官爲已不把人憐思量幾

許山川况土地分張又百年西蜀巉巖雲
迷鳥道兩淮清野日警狼烟宰相美權姦
人罔上誰念干戈未息肩大地何須經理
萬取千焉○度宗咸淳甲子又復經量湖
南等處時有詩云失淮失蜀失荆襄却把
江南寸寸量一寸縱教添一丈也應不似
舊封疆與首集議買
似道詩相似又有一剪梅詞云宰
相巍巍坐廟堂說着經量便要經量那箇

臣僚上一章頭說經量尾說經量輕狂太
守在吾邦聞說經量星夜經量山東河北
久拋荒好去經量胡不經量

翠妃

宸濠內寵甚盛有紫妃者居紫竹宮衣紫
素妃者居素英宮素粧翠妃者居綠英宮
飾綠翠能吟善書尤被寵幸宮四壁皆列
巨鑑光瑩晶明每與宴狎鑑中諸影妖媚

百出又于陽春書院疊石成山掘地數十
畝爲大池夏時芰荷芬馥濠與諸妃盡日
宴樂宮娥靚粧綃衣浮小畫艇歌采蓮曲
沿池蕩漾時摘花果進以侑酒翠妃嘗咏
梅花云繡針刺破紙糊窓引透寒梅一線
香縷蟻也知春色好倒拖花片上東牆甚
爲濠所賞後事敗翠妃爲一知縣掠去又
有趣妃爲舒國裳芬所得

袁長官女

孫恪遊洛中觀大第卽扉有女子摘萱草
吟云彼見是忘憂我見同萱草青山與白
雲方長我懷抱青衣曰故袁長官女求適
人格遂納爲室治家有法生二子恪爲南
海經畧判官至端州峽山寺袁氏欲至寺
訪舊識若熟其道徑持碧玉環獻僧曰此
是院寺舊物齋罷有猿數十下高松袁氏

惻然題壁曰無端造化幾湮沉罔被恩情
役此心不如逐伴歸山去長嘯一聲烟霧
深遂化爲老猿躍樹而去恪驚異詢僧僧
悟爲沙彌時養一猿高力士愛其黠慧以
束帛易之獻上陽宮安史之亂不知所之
碧玉環乃胡人所施繫於猿頂者

金陵養閒

張忠定詠少時謁陳圖南于華山欲留同

隱圖南曰他人不可留如公者吾當分半
以相奉但公方有官職未可議此其勢如
失火人家專待君救豈可不赴贈以詩曰
自吳八蜀是尋常歌舞筵中救火忙乞得
金陵養閒散亦須多謝鬢邊瘡始皆不喻
後更縵杭瘡發於頂遂自請得金陵醫治

虞姬廟對

倪鴻賢元璫題上虞縣虞姬廟對聯云今

尚祀虞漢世已無高后廟斯真霸越西施
羞上范家船按光武時斥呂后而以文帝
母薄太后配祀高帝

戲綵堂

趙閱道朴致仕家居子凱倅温州迎以就
養作戲綵堂閱道題詩堂中云我憇堂中
樂可知優游踰月意忘歸老萊不及吾兒
少且着朱衣勝彩衣

長髯客

嘉靖初吳縣殷秀才嘗過客道上修髯過腹餘髭垂兩頤拂唇而下者猶尺許殷心念彼飲食作何狀遂前揖之因叩姓名邀入酒肆設饌對酌客出袖中小銀鈎絡雙耳而掛其鬚食畢別去殷特欲看其飲噉初無意要結也明年下第自秣陵附商人舟南下中流遇盜皆跪伏不敢枝梧盜忽

問曰舟中是殷秀才否殷粹未應睨視其人卽長髯客也客大笑握手請罪邀入舟供具甚豐殷笑問銀鉤安在令二美女捧出以金卮送酒酬勸再三謝殷曰此地不足久留公行矣悉還其劫物以十束簾爲贈卽揚帆去客德殷復厚贈之殷抵蘇發東內皆精金蓋劫他商物也殷自是饒裕入貴爲郎任光州丞

君山

君山在澄江春申君葬於此故名萬曆中
京山郝楚望敬爲宰鐫詩墓旁云有客畫
山贈我者畫出君山江之野謂我狂歌似
楚人慷慨爲問春申君此山舊是君封邑
山色猶疑君在日楚客登臨憶楚山丹青
畫出請君看我笑不言心自語世事何勞
更僕數昔我飄零臥空谷一朝天子開黃

屋十年淪落老江干白首空嗟行路難百
歲如今已強半五十無聞我豈歎出來富
貴水東流詒謀何必定封侯笑君秘計托
紅粉竊國無成身已刎三千珠履安在哉
葦華寥落祇空墓只今黃山與黃水貌君
之名亦應悔願將此山與君分山上我題
詩山下君埋墳滄桑異日有升沉我詩君
骨總灰塵千秋萬歲後誰辨我與君

題紙帳

永樂中胡克仁壽安爲新昌令以古靈先生教民之言諭鄉耆里甲俾知親睦安分之道率皆從化克仁性清介不事奢侈在官惟粗衣糲食嘗題所眠紙帳云紫絲步障最奢華卧雪眠雲自一家雪又不寒雲又煖扶持清夢到梅花

却金亭

正統間福建都司王勝博學能文廉介自
持出巡則齋食自隨人呼爲萊王一日有
千戶奉白金不受命造亭衛北名却金明
年勝到亭題曰每因性褊遭彈劾四十年
過不動心匣內惟存三尺劍囊中肯受四
知金平生節操何曾改半點秋毫孰敢侵
今對此亭堪駐馬仰天無媿癸長吟時海
道副使李頤曰孔子忍渴盜泉之水曾子

迴車勝母之閭惡其名也暮夜金不受義也何必求聞於人因題云懷金相送獨能辭高構華亭照路岐不比當年胡刺史胡威父平生清節畏人知

中流砥柱贊

中流砥柱贊云此波不知東奔幾千百里此柱不知中立幾千百世非此波無以表此柱之壯非此柱無以障此波之靡其在

人也達而爲抑洪水驅猛獸之大禹周公
窮而爲作春秋距楊墨之孔子孟子又達
而爲掃俗學挽正傳之程子朱子其不幸
也爲江十四郡之所舌漁陽三百年之風
沙燕市嗚呼此其所以爲中流砥柱也歟
右贊見西園雜記中語亦簡鍊可誦惜不
知何人所作一云李西涯一云楊邃庵未
知孰是

藝祖屬猪

周駙馬張承德好延方士嘗有異人言天下將太平真主已出承德問誰答曰但觀紫黑色屬猪人宜善待之承德見藝祖勲位漸隆識其英表問其生年在亥乃傾身親附宋初以舊恩禮貌終藝祖世莫之少替潘紫南題陳圖南新睡圖云甲馬營中紫氣高屬猪人已着黃袍此回天下都無

事可是山中睡得牢指此也

漢書下酒

宋蘇舜欽字子美好飲酒豪放不羈客外
舅杜祁公家每夕讀書以斗酒爲率公疑
密覘之子美讀漢書張良傳至良與客狙
擊秦始皇帝撫掌曰惜乎擊之不中遂滿
飲一大卮又讀至良曰始臣起下邳與上
會于留此天以授陛下又撫案曰君臣相

遇其難如此復舉一大卮祁公笑曰有如此下酒物一斗不足多也

小孩兒

陳嶠字景山暮年登第還鄉已耳順矣嘗作閒居詩云小橋風月年年事爭奈潘安老去何後娶鄉里儒家女合卺之夕文士競集賦催粧詩咸有枯楊生稊之諷嶠自作云彭祖尚聞年八百陳嶠猶是小孩兒

客皆絕倒

于飛樂

錢某者衣冠之後年四十餘無室後成婚
有期作于飛樂詞云年少踈狂北里平康
十年占斷風光似一場春夢飲散高陽如
今休也醉眼獨自悽惶但古人有無錢斷
酒臨老剃度何妨散花紅頂花帽作箇新
郎低頭失笑幾回浪子從良

讓墻基

蜀楊尚書玠致仕歸長安舊居爲人侵占
子弟欲白於官以白玠玠批紙尾云四隣
侵我我從伊畢竟須思未有時試上含元
殿基望秋風秋草正離離○韻語晨鐘舒
國裳芬在翰林日其子數寄書云隣人歲
占墻址不休芬覽書題其尾云紙紙家書
只說墻讓渠徑寸有何妨秦皇枉作千年

計今見城墻不見王遂緘封却寄子誦其
詩謂父駑下不能助已洩憤遂棄其書鄰
人間而覓得之感其盛德自毀其墻任其
築取已而兩相讓各得其平相安如舊與
吾鄉揚仲舉事同事觀三公如此襟度真
八荒我闔千古爲侶更何人已眇畦足當
一瞬

山庄四樂

宋舒城李公麟作山庄四樂詩桃李花開
春雨晴聲聲布穀迎村鳴家家塲頭酌酒
觥爲告庄主東作興黃犢先破東南村一
火雲蔽日當空浮田頭耨草汗欲流綠竹
人寂鳥聲休暫來歇午乘清幽山妻送餉
扇遮頭二黃雲萬里秋有成村村酒熟家
家迎剗羊賽社人不醒醉後鼓腹歌昇平
欣然向樂湔倉盈三寒風十月雪欲飛屠

人木榻添紙幃地爐活火酒頻煨瓦盃不
脫羊羔肥醉來曲肱歌聲微

端明不愛錢

司馬君貴置獨樂園春際草木秀茂許人
往觀游人以錢與園丁呂直謂之茶湯錢
積至千而納於公公曰吾豈少此耶直曰
天地間只端明不愛錢於是創一井亭以
便行客直亦不私其錢

陸滄浪

揚州陸滄浪狂士也好作俚語正德間從
成京師有楊果不果一清不清朱安不安
朱寧不寧等語寧知而執之聞曰汝作詩
時曾吃醉否陸正色曰我實不醉寧竟釋
其罪僅調邊方而去時有投陸詩云落魄
當年老陸郎智囊今已作詩囊醉中又復
重來醉狂裡如何更着狂踰海踰河何日

了奔南奔北自家忙不如檢點親經史一
掃清風舊草堂或云卽朱所作以復其諷
已也

謝蝴蝶

宋謝無逸工詩吟蝴蝶二百首人呼爲謝
蝴蝶佳句如飛隨柳絮有時見舞入梨花
何處尋又江天春煖晚風細相逐賣花人
過橋又身似何郎全傅粉心如韓壽愛偷

香古詩有陌上斜飛去花間到翅回李義
山詩蘆花惟有白柳絮可能溫終不如謝
意深遠後單菊坡有四絕云煖入名園萬
物芳風情多半爲春忙偶然飛向花前遇
惹得詩人訝竊香 粉翅雙翻大有情海
棠庭院往來輕當時只羨滕王巧一段風
流畫不成 桃紅空白一番新對舞花前
亦可人纔過東來又西去片時遊遍滿園

春 從知嗜慾損天真不道人間別有春
何似桃源千萬樹却來相逐賣花人

于少保口占

西園雜記于少保遇難之時從容口占一
詩云莊椿居士老婆娑成就人間好事多
正統再更新歲月大明重整舊山河功超
呂望扶周室德邁張良散楚歌長歎一聲
歸去也白雲堆裏笑呵呵

章劉友善

章子厚與劉子先友善子先守姑蘇以新
醞洞庭春寄子厚子厚答詩云洞霄宮裏
一閒人東府西樞舊老臣多謝姑蘇賢太
守殷勤分送洞庭春後契濶十年子厚拜
相亦不通問子厚寄書言其相忘遠引之
意子先以詩謝之曰故人天上有書來責
我踈愚喚不回兩處共瞻千里月十年不

寄一枝梅塵泥自與雲霄隔
駑馬難追騷
裏才莫謂無心向門下
也曾終夕望三台
子厚得書大喜召爲戶部侍郎

驛壁詩

夢筆驛乃江淹舊居姚金聲宏題一絕云
一宵短夢驚流俗
千載高名掛里閭
遂使晚生矜此意
痴眠不讀一行書
建州崇安分水驛一絕云
江南三月已聞蟬
麥熟梅

黃茵作綿料得故園烟雨裏輕寒猶作卷
花天又鎮江丹陽玉乳泉壁間一絕云驛
馬出門三月暮揚花無柰雪漫天客情最
苦夜難渡宿處先尋無杜鵑詩有風人遺
意惜不知作者姓氏也

滕王閣望湖亭

宋僧晦幾滕王閣詩云檻外長江去不回
檻前楊柳後人栽當時惟有西山在曾見

滕王歌舞來首句長江去不回往事不可
問矣次句檻前楊柳亦後人所裁三四句
謂當時曾見滕王歌舞者惟有西山在矣
念蓄無窮感慨係之又蘇子瞻望湖亭詩
云黑雲堆墨未遮山白雨跳珠亂入船鷖
地風來忽吹散望湖亭下水連天陰陽變
化開闔於俄頃之間其氣雄語壯所謂吞
雲夢者後人所作皆不能及

造洛陽橋

呂洞賓入峩眉山採藥著詩云太乙宮前
是我家詩書萬卷作生涯春風醉酒不歸
去落盡碧桃無限花五百年後當遭雷厄
洞賓化青蛇隱於泉州蔡襄爐內襄鎔爐
讀書一夕雷震判官云雷部速退無驚宰
相天乃開霽洞賓出揖曰蒙君福蔭謝以
筆墨泉人嘗譏襄曰雨打襄雞形襄卽曰

脚下有龍鱗五更高聲叫驚起世間人後
登科仁宗朝爲學士出守泉州造洛陽橋
以洞窟筆墨爲檄使隸之海若而告之隸
歎曰茫茫遠海何所投檄買酒酣飲醉卧
海涯潮落而醒則檄已易封矣襄啟閱之
惟一醋字襄曰神示我矣廿一日酉時興
工乎至期潮水果三晝夜不進其日正犯
九良星襄策馬當之曰你是九良星我是

蔡端平相逢不下馬各自分前程遂與作
無忌或上言擅開官庫襄謝恩詩云得饒
人處且須饒曾借龍王三日潮十萬貫錢
常在世我王恩在洛陽橋上許之橋成時
人以詩頌之曰疊石爲橋與路通惠安之
北晉江東幾時募化千家寶一旦緣成萬
載功五尺欄干遮巨浪兩頭華表鎮危峯
往來無限行人口日月齊休誦蔡公

陶穀草制

玉堂嘉話載陶穀草范質拜相制有云十年居調燮之司一旦得變通之術質得之泣訴藝祖由是薄之然袖中彈文亦變通之尤者穀可謂明於責人而不知自責矣瞿宗吉香臺集有詩云受禪文成識變遷閒情猶到煮茶邊可憐畫盡葫蘆樣不與鸞膠續斷絃

未生保

正德壬申流賊劉六輩大擾中原真抵湖
廣育司籍民兵捍禦率三丁抽一名爲驍
勇不盈其數捶責里老將不成丁者填報
又不已僞以虛名註冊曰未生保以塞責
各省皆然楚城尤甚金陵沈寶作詩曰未
生保舊冊新供查對了寧死只愁官打拷
一丁已作三丁報誰爲里正誰屯老過堂

官惟成丁少丁丁研審盡同名此理看來
有難曉抱屈含啼向官道但恨兒孫生不
早大半成丁猶襁褓在腹名爲未生保膏
血不克官一飽春草殞霜還殺草前年民
戶損七分官廩何曾到流殍嗟乎國家養
兵歲糜廩祿鉅萬萬至寇盜生發則選民
兵及調邊軍土軍勦之而搃領者弗能鈐
制任其劫掠屠戮其害更甚於盜賊今幸

遇太平之世又幸生蘇杭福地嘗力行善
事以報答天恩免亂離之苦幸甚

聞忙令

宋真宗祥符中命詞臣撰日本國祥光記
當直者學不優以張君房代筆傳宣甚急
而張適醉倒藥樓促之不醒紫微大嘗揚
大年錢希白戲作閒忙令以誚之曰世上
何人號最閒司監拂衣歸華山世上何人

號最忙紫薇失却張君房

賦犬

寒齋瑣綴錄坐客偶談有人好食犬主人
知其意命賦犬詩以蓋字爲韵客立就云
幾年辛苦伴齏鹽長夜巡行護短簷戀戀
見人渾識舊依依向主肯趨炎卧從芳草
苔痕破立傍梅花雪片粘曾向山中擒狡
兔拔毫製筆與君拈主人喜殺犬食之

詩媒

趙德麟喪偶欲得善配未有久之王氏有
老女未嫁作詩云白藕作花風已秋不堪
殘睡更回頭晚雲帶雨歸飛急去作西窓
一夜愁趙見詩遂求婚焉人以爲二十八
字媒也又明初王旬字子宣嘗作宮詞云
南風吹斷採蓮歌夜雨新添太液波水殿
風雲一作廊三十六不知何處晚涼多仁和

會元俞友仁見而悅之曰此其得意句遂
以妹妻之與德麟事同列朝詩選作黃崔
山樵王蒙事

小九

豫章洪玉父炎黃山谷之甥有侍兒小九
知書能爲玉父檢閱甚愛之嘗月夜攜登
滕王閣玉父賦詩云桃花亂打散花樓南
浦西山送客愁爲理伊州十二疊緩歌聲

裏看洪洲後因兵亂失之玉父悵悵不已
又和前詩云西江東畔見江樓江月江風
萬斛愁試問海潮應念我爲將雙淚到南
洲已而玉父復尋得之

趙子昂詞

趙松雪戲作小詞贈管夫人云我儂兩個
忒然多情譬如將一塊泥捏一箇你塑一
箇我忽然歡喜呵將他來一齊都打破重

新下水再團再鍊再調和重塑一箇你再
提一箇我那其間那其間我的身子裏有
了你你的身子裏有了我

佛印書壁

東坡挾妓登金山以酒醉佛印戲命妓同
卧佛印醒而書壁云夜來酒醉上床眠不
覺琵琶在枕邊傳語翰林蘇學士不曾彈
動一條絃

錢神論

揚升庵集晉惠帝之時賄賂公行魯褒所
爲作錢神論也余觀類文同時綦母民成
公綏皆有錢神論各一篇民之論畧曰黃
金爲父白銀爲母鉛爲長男錫爲少婦庚
辛分土諸國皆有長沙越雋僕之所守伊
我初生周末時也景王伊世大儔茲也貧
人見我如病得醫饑享太牢未足爲飽綏

之論畧曰路中紛紛行人悠悠載馳載驅
惟錢是求朱衣素帶當塗之士執我之手
門常如市諺曰錢無耳鬼可使豈虛也哉
幽求子云可以使鬼者錢也可以使人者
權也蓋亦同時之語○袁中郎讀錢神論
詩閒來偶讀錢神論始識人情今益古古
時孔方比阿兄今日阿兄勝阿父李密庵
先生詩云孔方久已諧公論孟姑新號自

蒙古舜跖而今總混名子輿得時跨尼父
○顧元慶簷曝偶談云魯褒錢神論世多
以爲然鄙者至以兄呼之殊可令人羞若
事錢如事兄其於父子兄弟君臣朋友幾
何不相戕賊矣稽其爲用直人役耳不問
艱險汙穢清濁是非轉化姦回善如人意
蓋奴僕之超絕者也古人以不言爲高太
多爲臭君子不敢喻而天下日夜羣趨之

而不止若復彰以兄名其害將不勝言名
曰孔奴於理爲當○或問伍荅庵云錢神
亦有不靈時否荅庵曰錢神是淫昏之鬼
遇貪邪則靈遇廉正則死死則不靈

李南金題像

宋李南金登第後畫師以冠裳寫其真自
題詩云落魄江湖十二年布衫濶袖裹風
烟如今各樣新粧束典却清狂賣却顛

張胡叅禪

指歸集采狀元張九成告歸泉石一日訪
叅喜禪師曰汝來何故九成曰打死心頭
火特來叅喜禪師以言探之曰緣何起得
早妻被別人眠九成怒曰無明真禿子焉
敢發此言師慰之曰輕輕撲一扇爐中使
起烟九成慚媿不已遂去髮爲僧號無垢
子大開禪宗○捋燈集異載明初白雲禪

師麗水人道行高妙將軍胡深常造之曰
滅却心頭火特來叅老禪白雲續之曰將
軍來太早妻伴別人眠深怒欲刃之白雲
曰心頭火未滅畧撥卽生烟深媿謝白雲
曰若問前程事古月下西川後深果敗死
所云古月指其姓也與九成事同

古今相較

西園雜記今人於人之嚴肅難犯者則稱

之曰包籠圖於人之清狷有守者則稱之
曰趙清獻於人之秉禮嗜古者則稱之曰
假司馬溫公吾吳則曰朱文公於人之咬
來扇去言行反覆者則目之曰湯思退吾
吳則曰伯詔於人之瞞心昧已挾詐欺人
者則目之曰賈似道吾吳則曰秦檜夫人
立身於千載之前而好惡定於千載之後
可不知所自處哉

黃陵廟詩

陸士規布衣工詩泰檜喜之嘗挾檜書于
臨川守餽遺不滿意升堂慢罵守懼以書
白檜自解檜怒陸陸請見不出然猶令小
相見之間陸近作陸誦黃陵廟一絕云東
風吹草綠離離路入黃陵古廟西帝子不
知春又去亂山無主鷓鴣啼小相入誦之
檜吟咏再四卽命入見待之如初